

Opitz, Martin: Lieb der Sterckste Bundt (1624)

1 Laß Bündnuß Bündnuß sein/ die grossen Herrn behagen/
2 Da Land vnd Land wird eins/ sich friedlich zu betragen/
3 Vnd da man Gut vnd Blut zusammen setzen wil/
4 Wo etwan einer käm/ dem Vehd vnd Krieg gefiel.
5 Es ist ein zweifflich ding/ vff Bündnuß sich verlassen/
6 Dieselbe brechen offt/ gantz vnverhoffter massen/
7 Wen findstu der da halt/ was er dir hat geschworn?
8 Du suchst jhn dann bey denn/ die vor vns warn geborn.
9 Bißweilen drennt die Forcht was einmal ist verglichen/
10 Bißweilen macht das Gelt/ durch Bündnuß einen strichen/
11 Bißweilen vnglück auch dieselbe schneid entzwey/
12 So bald Gefahr sich regt/ seind Bündnuß wie ein Ey.
13 Das ist ein vester Bund/ da sich die Lieb gesellet/
14 Da sich die Liebe selbst für einen Zeugen stellet/
15 Da Lieb ist selbst der Eyd/ daß Pitschafft vnd die Hand/
16 Der Vnderhändler selbst/ der Bott vnd Abgesandt.
17 In diesem fall hat nichts das böse Glück zu hoffen/
18 Hie hat das Glück gar offt die Hörner abgeloffen/
19 Je mehr dasselbig wüth/ je stercker wird die Trew/
20 Durch vngerahnte Tag wird nur die Liebe new:
21 Gleich wie die rawe Kält/ so durch vnd durch thut schneiden/
22 Mag zwey in einem Bett durch sein gewaltnicht scheiden/
23 Je mehr die Winters zeit die zarte Leiber druckt/
24 Je mehr vnd mehr als dann die Lieb zur Liebe ruckt.
25 Ein Jungfraw saß allein/ vnd sang von Liebs gedancken/
26 Sie sprach von dir/ mein Hertz/ begehrich nicht zu wancken/
27 Vnd muß ich mit dir gehn/ durch Fewer/ Schnee vnd Kelt/
28 Vnd durch das wilde Meer/ wie Zornig es sich stelt.
29 Ich dacht in meinem Sinn/ ob es solt möglich scheinen/
30 Ich fragt die Braut darumb/ Sie that es nicht verneinen/
31 Sie sprach/ die Kelt ist warm/ Sie sprach die Hitz ist kühl/
32 Wann ich die Liebe nur in meinem Hertzen fühl.
33 Ich fragt den Bräutigam/ er solt sein Meinung sagen/

- 34 Er antwort mir geschwind/ ich solt mich selber fragen?
35 Ich schweig vnd gieng davon/ dacht vnter Wegs bey mir/
36 Wie nun Herr Bräutigam/ wer sagt die sachen dir?

(Textopus: Lieb der Sterckste Bundt. Abgerufen am 23.01.2026 von <https://www.textopus.de/poems/10770>)